



চুক্তিনামা

“স্থানীয় পর্যটন” খাগড়াছড়ি পার্বত্য জেলা পরিষদে হস্তান্তর

সম্বন্ধে: পার্বত্য চট্টগ্রাম বিষয়ক মন্ত্রণালয়

**খাগড়াছড়ি পার্বত্য জেলার স্থানীয় পর্যটন এবং বর্তমানে উক্ত জেলায় বাংলাদেশ
পর্যটন করপোরেশনের স্থাপনা/ইউনিট সমূহ খাগড়াছড়ি পার্বত্য জেলা পরিষদের নিয়ন্ত্রণে হস্তান্তর চুক্তিপত্র :**

যেহেতু খাগড়াছড়ি পার্বত্য জেলা পরিষদ আইন, ১৯৮৯ (১৯৮৯ সনের ২০নং আইন, যা ১৯৯৮ সনের ১০নং আইন দ্বারা সংশোধিত)-এর ধারা ২২ এ বর্ণিত ১ম তফসিলের ২৮নং ক্রমিকে উল্লিখিত কার্যাবলী বাস্তবায়নের নিমিত্ত স্থানীয় পর্যটন এবং বর্তমানে উক্ত জেলায় বাংলাদেশ পর্যটন করপোরেশনের স্থাপনা/ইউনিটসমূহ খাগড়াছড়ি পার্বত্য জেলা পরিষদের নিয়ন্ত্রণে হস্তান্তর করিতে সরকার ইচ্ছা প্রকাশ করিয়াছেন ;

যেহেতু বাংলাদেশ পর্যটন করপোরেশন সরকারের একটি বিশেষায়িত ও স্ব-অর্থায়নে পরিচালিত বাণিজ্যিক সংস্থা যা সমগ্রদেশে পর্যটন উন্নয়ন, প্রসার ও বিকাশে নিয়োজিত ;

এবং যেহেতু সংশ্লিষ্ট মন্ত্রণালয় ও খাগড়াছড়ি পার্বত্য জেলা পরিষদের মধ্যে এই বিষয়ে আলোচনা হইয়াছে এবং উক্ত আলোচনার পরিপেক্ষিতে খাগড়াছড়ি পার্বত্য জেলা পরিষদ স্থানীয় পর্যটন এবং বর্তমানে উক্ত জেলায় বাংলাদেশ পর্যটন করপোরেশনের স্থাপনা/ইউনিটসমূহ নিম্নবর্ণিত শর্ত সাপেক্ষে গ্রহণ করিতে সম্মত হইয়াছেন ;

সেহেতু সরকার উপরিউক্ত আইনের ২৩(খ) ধারায় প্রদত্ত ক্ষমতাবলে বাংলাদেশ পর্যটন করপোরেশন এর বর্তমানে চালু ইউনিট/স্থাপনাসমূহ নিম্নলিখিত শর্তে খাগড়াছড়ি পার্বত্য জেলা পরিষদে হস্তান্তর করিলেন :

১। কর্ম ও বিষয় :

খাগড়াছড়ি পার্বত্য জেলার

- (ক) সকল স্থানীয় কার্যক্রম তত্ত্বাবধান ও সমন্বয় সাধন ;
- (খ) স্থানীয় পর্যটন উন্নয়নের জন্য স্থানীয়ভাবে পরিকল্পনা প্রণয়ন, প্রকল্প গ্রহণ ও বাস্তবায়ন ;

২। উন্নয়ন পরিকল্পনা :

- (ক) কর্ম ও বিষয়ের সাথে সংশ্লিষ্ট কোন প্রকল্প বা কর্মসূচী বিদেশী সাহায্য সংস্থা/উন্নয়ন সহযোগী সংস্থা কর্তৃক গ্রহণ ও বাস্তবায়নের ক্ষেত্রে খাগড়াছড়ি পার্বত্য জেলা পরিষদের পর্যটন সংক্রান্ত নিজস্ব কার্যক্রমের সহিত সমন্বয় রাখিয়া প্রচলিত বিধি-বিধান অনুসরণপূর্বক তা সম্পাদন করিতে হইবে ;
- (খ) বেসামরিক বিমান পরিবহন ও পর্যটন মন্ত্রণালয় কর্তৃক কেন্দ্রীয়ভাবে গৃহীত প্রকল্পসমূহ সংশ্লিষ্ট Operation Plan এবং উন্নয়ন প্রকল্প দলিল অনুযায়ী খাগড়াছড়ি পার্বত্য জেলা পরিষদের সহিত সমন্বয়পূর্বক বাংলাদেশ পর্যটন করপোরেশনের মাধ্যমে বাস্তবায়িত হইবে ।

৩। জনবল ব্যবস্থাপনা(বর্তমান স্থাপনার জন্য) :


- (ক) বাংলাদেশ পর্যটন করপোরেশন একটি বিশেষায়িত বাণিজ্যিক সংস্থা হওয়ায় এবং এর জনবল কেন্দ্রীয়ভাবে বিশেষ প্রশিক্ষণ ইন্সটিটিউটে প্রশিক্ষিত বিধায় জনবল সংক্রান্ত ব্যবস্থাপনার বিষয়টি বাংলাদেশ পর্যটন করপোরেশন কর্তৃক পরিচালিত হইবে ;
- (খ) কর্মকর্তাদের ছুটি, প্রশিক্ষণ ও শৃঙ্খলামূলক ব্যবস্থা বাংলাদেশ পর্যটন করপোরেশন-এর প্রচলিত বিধি বিধান ও নিয়মানুসারে পরিচালিত হইবে । ব্যবস্থাপক/ইউনিট ব্যবস্থাপকগণের নৈমিত্তিক ছুটি মুখ্য নির্বাহী কর্মকর্তার সুপারিশের ভিত্তিতে পরিচালক (বাণিজ্যিক), বাংলাদেশ পর্যটন করপোরেশন মঞ্জুর করিবেন এবং কর্মস্থল ত্যাগের অনুমতি প্রদান করিবেন । অন্যান্য সকল কর্মকর্তার নৈমিত্তিক ছুটি ব্যবস্থাপক/ইউনিট ব্যবস্থাপকগণ প্রদান করিবেন ।
- (গ) তৃতীয় ও চতুর্থ শ্রেণীর কর্মচারীগণের ছুটি, প্রশিক্ষণ ও শৃঙ্খলামূলক বিষয়ে মুখ্য নির্বাহী কর্মকর্তার সুপারিশের ভিত্তিতে পরিচালক (বাণিজ্যিক), বাংলাদেশ পর্যটন করপোরেশন-এর অনুমোদনক্রমে ব্যবস্থাপক/ইউনিট ব্যবস্থাপকগণ ব্যবস্থা গ্রহণ করিবেন ;
- (ঘ) তৃতীয় ও চতুর্থ শ্রেণীর কর্মচারীদের স্বাভাবিক মেয়াদ পূর্তির পূর্বে জেলার বাইরে বদলী করা যাইবে না । তবে জনস্বার্থে বিশেষ কারণে বদলী করিবার ক্ষেত্রে খাগড়াছড়ি পার্বত্য জেলা পরিষদের সাথে পরামর্শক্রমে বাংলাদেশ পর্যটন করপোরেশন ব্যবস্থা গ্রহণ করিতে পারিবে ।
- (ঙ) তৃতীয় ও চতুর্থ শ্রেণীর কর্মচারীদের নিয়োগের বিষয়টি বাংলাদেশ পর্যটন করপোরেশন চাকুরী প্রবিধানমালা ১৯৯০ অনুযায়ী পরিচালিত হইবে । সংশ্লিষ্ট পদে যোগ্যতা থাকা সাপেক্ষে স্থানীয় নাগরিকদের অগ্রাধিকার প্রদান করা হইবে ।

৪। আর্থিক ব্যবস্থাপনা(বর্তমান স্থাপনার জন্য) :

- (ক) কর্মকর্তা ও কর্মচারীদের বেতন ভাতা ও অফিসিয়াল অন্যান্য সকল ব্যয় বাংলাদেশ পর্যটন করপোরেশন নির্বাহ করিবে ;
- (খ) বাংলাদেশ পর্যটন করপোরেশনের বর্তমানে চালু স্থানীয় হোটেল, মোটেল, বিনোদন স্পট, অডিটোরিয়াম ইত্যাদি ও অন্যান্য উৎস হইতে প্রাপ্ত নীট মুনাফার ১০% স্থানীয় পর্যটন উন্নয়নে ব্যবহারের নিমিত্ত খাগড়াছড়ি পার্বত্য জেলা পরিষদের তহবিলে জমা প্রদান করা হইবে ।

৫। বার্ষিক গোপনীয় প্রতিবেদন(বর্তমান স্থাপনার জন্য) :

- (ক) কর্মকর্তা/কর্মচারীদের মূল্যায়নের জন্য প্রচলিত বার্ষিক গোপনীয় অনুবেদন ছাড়াও একটি বার্ষিক বিশেষ মূল্যায়ন প্রতিবেদনের মাধ্যমে তাহাদের কার্যক্রম মূল্যায়ন করা হইবে । ব্যবস্থাপক/ইউনিট ব্যবস্থাপকগণের বার্ষিক বিশেষ মূল্যায়ন প্রতিবেদন জেলা পরিষদের মুখ্য নির্বাহী কর্মকর্তা কর্তৃক স্বাক্ষরিত ও খাগড়াছড়ি পার্বত্য জেলা পরিষদের মাননীয় চেয়ারম্যান কর্তৃক প্রতিস্বাক্ষরের পর বাংলাদেশ পর্যটন করপোরেশনে সংরক্ষণ করা হইবে । অন্যান্য কর্মকর্তা/কর্মচারীদের বার্ষিক বিশেষ মূল্যায়ন প্রতিবেদন ব্যবস্থাপক/ইউনিট ব্যবস্থাপকগণ কর্তৃক স্বাক্ষরিত ও জেলা পরিষদের মুখ্য নির্বাহী কর্মকর্তা কর্তৃক প্রতিস্বাক্ষরের পর বাংলাদেশ পর্যটন করপোরেশনে সংরক্ষণ করা হইবে । কর্মকর্তা/ কর্মচারীদের পদোন্নতিসহ চাকুরীর অপরাপর ক্ষেত্রে এই বার্ষিক বিশেষ মূল্যায়ন প্রতিবেদন গুরুত্ব সহকারে বিবেচিত হইবে ।



১০/৬

অপর পৃষ্ঠায় দ্রষ্টব্য

৬। স্থানীয় পর্যটন বিকাশে ভবিষ্যতে সম্প্রসারিতব্য কার্যক্রম পরিচালনাঃ

কর্ম ও বিষয়ঃ

- (ক) খাগড়াছড়ি পার্বত্য জেলার সকল স্থানীয় পর্যটন কার্যক্রম তত্ত্বাবধান ও সমন্বয় সাধন ;
(খ) স্থানীয় পর্যটন উন্নয়নের জন্য স্থানীয়ভাবে পরিকল্পনা প্রণয়ন, প্রকল্প গ্রহণ ও বাস্তবায়ন ;

উন্নয়ন পরিকল্পনাঃ

- (ক) স্থানীয় পর্যটন বিকাশে সরকার বাংলাদেশ পর্যটন কর্পোরেশনের মাধ্যমে খাগড়াছড়ি পার্বত্য জেলা পরিষদের সাথে সমন্বয় পূর্বক উন্নয়ন পরিকল্পনা গ্রহণ করিতে পারিবে ;
(খ) স্থানীয় পর্যটন বিকাশে মাস্টার প্ল্যান অনুযায়ী খাগড়াছড়ি পার্বত্য জেলা পরিষদ হোটেল, মোটেল, বিনোদন স্পট, অডিটোরিয়াম ও অন্যান্য স্থাপনা নির্মাণ করিতে পারিবে ;
(গ) স্থানীয় পর্যটন উন্নয়নের স্বার্থে খাগড়াছড়ি পার্বত্য জেলা পরিষদ তাদের নিজস্ব অর্থায়নে প্রকল্প/কর্মসূচী/উদ্যোগ গ্রহণ করিতে পারিবে, প্রয়োজনে বাংলাদেশ পর্যটন কর্পোরেশনের সহযোগিতা চাইতে পারিবে ;
(ঘ) কর্ম ও বিষয়ের সাথে সংশ্লিষ্ট কোন প্রকল্প বা কর্মসূচী বিদেশী সাহায্য সংস্থা/উন্নয়ন সহযোগী সংস্থা কর্তৃক গ্রহণ ও বাস্তবায়নের ক্ষেত্রে খাগড়াছড়ি পার্বত্য জেলা পরিষদের পর্যটন সংক্রান্ত নিজস্ব কার্যক্রমের সহিত সমন্বয় রাখিয়া প্রচলিত বিধি-বিধান অনুসরণপূর্বক তা সম্পাদন করিতে হইবে ;

জনবল ব্যবস্থাপনাঃ

- (ক) স্থানীয় পর্যটনের উন্নয়নের জন্য খাগড়াছড়ি পার্বত্য জেলা পরিষদ কর্তৃক গৃহীত উন্নয়ন প্রকল্প প্রধান অথবা এতদসংশ্লিষ্ট কর্মকর্তা/কর্মচারীর ছুটি, প্রশিক্ষণ ও শৃঙ্খলামূলক ব্যবস্থা খাগড়াছড়ি পার্বত্য জেলা পরিষদ কর্তৃক এতদসংক্রান্ত প্রণীত প্রবিধান দ্বারা পরিচালিত হইবে। প্রকল্প প্রধানসহ অন্যান্য কর্মকর্তা/কর্মচারীদের প্রশিক্ষণের জন্য বাংলাদেশ পর্যটন কর্পোরেশন প্রয়োজনীয় সহযোগিতা প্রদান করিবে।

- (খ) তৃতীয় ও চতুর্থ শ্রেণীর কর্মচারীদের নিয়োগের বিষয়টি পার্বত্য চট্টগ্রাম বিষয়ক মন্ত্রণালয়ের অনুমতিক্রমে খাগড়াছড়ি পার্বত্য জেলা পরিষদ কর্তৃক প্রণীত প্রবিধানমালা অনুযায়ী পরিচালিত হইবে।

আর্থিক ব্যবস্থাপনাঃ

কর্মকর্তা ও কর্মচারীদের বেতনভাতা ও অফিসিয়াল অন্যান্য সকল ব্যয় খাগড়াছড়ি পার্বত্য জেলা পরিষদ কর্তৃক পর্যটন শিল্পের আয় হইতে নির্বাহ করা হইবে।

বার্ষিক গোপনীয় প্রতিবেদনঃ


স্থানীয় পর্যটনের উন্নয়নে নিয়োজিত জনবলের বার্ষিক গোপনীয় প্রতিবেদন খাগড়াছড়ি পার্বত্য জেলা পরিষদের প্রচলিত প্রবিধান দ্বারা পরিচালিত হইবে।

৭। চুক্তি সংশোধন ও বলবৎকরণঃ


- (ক) খাগড়াছড়ি পার্বত্য জেলা পরিষদ এবং বাংলাদেশ পর্যটন কর্পোরেশন চুক্তিতে বর্ণিত শর্তসমূহ প্রয়োজনবোধে যৌথভাবে পর্যালোচনা করিবে এবং জনস্বার্থে ঐক্যমতের ভিত্তিতে এই চুক্তি পার্বত্য চট্টগ্রাম বিষয়ক মন্ত্রণালয় এবং বেসামরিক বিমান পরিবহন ও পর্যটন মন্ত্রণালয়ের মাধ্যমে পরিবর্তন, পরিবর্ধন, সংশোধন ও সংযোজন করিতে পারিবেন ;
(খ) চুক্তি বাস্তবায়নে এবং ইহার ব্যাখ্যার ব্যাপারে বাংলাদেশ পর্যটন কর্পোরেশন এবং খাগড়াছড়ি পার্বত্য জেলা পরিষদের মধ্যে কোন বিরোধ দেখা দিলে বেসামরিক বিমান পরিবহন ও পর্যটন মন্ত্রণালয় এবং পার্বত্য চট্টগ্রাম বিষয়ক মন্ত্রণালয়ের মধ্যে আলোচনার মাধ্যমে বিরোধ নিষ্পত্তি করিবে ;
(গ) বিদ্যমান/বিচারার্থীন মামলা বা ভবিষ্যতে কোন বিষয়ে মামলার উদ্ভব হলে উভয় পক্ষ ঐক্যমতের ভিত্তিতে বিষয়টি নিষ্পত্তির লক্ষ্যে প্রয়োজনীয় কার্যক্রম গ্রহণ করিবে।

এই চুক্তি অদ্য ২৮ আগস্ট, ২০১৪ খ্রিষ্টাব্দ/ ১৩ ভাদ্র, ১৪২১ বঙ্গাব্দ হইতে কার্যকর হইবে।

আমরা এ চুক্তিনামার উপরে উল্লেখিত বিষয়গুলি বর্ণিত শর্ত সাপেক্ষে গ্রহণ করিতে সম্মতি জ্ঞাপন করিলাম।



(চাইথোঅং মরিমা)
চেয়ারম্যান

খাগড়াছড়ি পার্বত্য জেলা পরিষদ।


২৮/০৮/১৪
(খোরশেদ আলম চৌধুরী)
সচিব

বেসামরিক বিমান পরিবহন ও পর্যটন মন্ত্রণালয়

পর্যবেক্ষক


২৮/৮/১৪
(নেব বিক্রম কিশোর ত্রিপুরা, এনডিসি)
সচিব

পার্বত্য চট্টগ্রাম বিষয়ক মন্ত্রণালয়।